

3. no. 2
ARREST
DV SOUVERAIN
RAIN SENAT DE
SAVOYE, AVEC
l'ordre de son Altesse,
sur le faict de la
Religion.

PARIS,

*Pour Jean Dallier Libraire, demourant sur le pont
saint Michel, à l'enseigne de la Rose blanche.*

1362.

Avec priuilege.

1790
EDWARD WILSON

1790
EDWARD WILSON
1790
EDWARD WILSON



*ARREST DV SOVVE-
RAIN SENAT DE SAVOYE,
Auec l'ordre de son Altesse, sur
le faict de la Religion.*



Sur la remonstrance
faicte par le Procureur
general de son
Altesse, afin que cõ-
mandemẽt soit faict
à tous manans & habitans de ce res-
fort d'asister, & se trouuer aux pres-
ches & sermõs, qui se ferõt les sainctz
iours de feste, Aduentz, Kareme, &
autres iours, ordonnez pour cest ef-
fect: Ensemble sur le reiglement par

ARREST POVR

luy requis à l'entretienement, & augmentation de nostre sainte Foy & religion catholique.

LE Senat ayant esgard aux remonstrances faictes par le Procureur general, & pour tousiours amplifier le seruice de Dieu, & avec tout soing & vigilance deüe, entretenir les subiectz de ce ressort en la religion Catholique: & couper la source d'ou peut proceder le delaissement & apostasie de nostre sainte Foy. Et afin de rendre libre la deuotion & bon zele des Chrestiens & Catholiques. A ordonné & ordonne, que commandemens & expresses inionctions seront faictes à tous chefs de maison, & peres de famille, & leurs enfans, de ce ressort: de doreseuuant les saintz iours de feste, Aduentz & Carême: assister aux sermons & predi-

cations aux eglises, & lieux accoustu-
mez, aux heures ordinaires, sur peine
de dix liures fortes d'amende pour la
premiere faulte, payables sans des-
port, de prison pour la secôde, & de
punition exemplaire pour la tierce:
sinon que pour quelque grande ne-
cessité de maladie, ou autrement ilz
fussent empeschez de ce faire.

D'auantage & par mesme moyen
ordonne ledict Senat qu'iceux mai-
stres des maisons, & pere de famille
enuoyeront lesdictz iours de feste,
Aduentz & Karesme, leurs seruiteurs
& châbrieres, & autres domestiques
à la premiere Messe, qui se celebrera
aux eglises parochiales, aux heures
qui seront par cy apres ordonnées,
pour ausdictz lieux & heures avec la
messe, ouyr la sommaire predicatiõ
qui se fera pour cest effect.

ARREST POVR

Et en oultre par mesme moyen or donne que tous maistres d'escole seront tenuz lire & faire apprendre par cœur tous les iours à leurs disciples, & escoliers, la doctrine Chrestienne & Catholique, contenue es liures de M. Pierre Canisio docteur en Theologie.

Et aux enfans de leurs escoles, & ceux qui n'entendent encores la langue Latine, mais sont abecedaires, & commençans à lire: les apprendrôt le dictz maistres d'escole à lire, & appeller leurs lettres, sur les Catechismes François, & autres liures catholiques faictz pour cest effect, approuuez de la saincte faculté de Theologie de Paris, Reims, & autres lieux & vniuersitez, & qui contiennent expresse confessiõ de la Foy catholique: lesquels pour ceste cause seront imprimez, &

exposez en vente, à celle fin que lesdictz maistres d'ecole instruisent la ieunesse en bōs & saictz liures, pleins de doctrine catholique: & nō par vn Ouide de arte amandi, ou par ses Epistres, ou autres liures desquelz ilz ne peuuent tirer qu'occasion de peché & corruptiō de toutes bōnes mœurs.

Prendront garde lesdictz maistres d'ecole singulierement à ce que leurs escoliers & disciples à l'entrée de leurs escoles, inuoquēt la grace & ayde de Dieu, en se recōmandant à luy, & disant le Pater noster, Ave Maria, & le Credo, cōme estant ce bon Dieu commencemēt de toute bonne chose, sagesse & discipline.

EN outre ordōne le Senat, que lesdictz Maistres aux plus principales lectures qu'ilz ferōt à leurs Escoliers, interpreteront liures traictans de la

A R R E S T P O U R

doctrine Chrestienne, & donneront themes, selon leur coustume de semblable argument. Et leur feront parler par leur familier colloque, de telz propos sainctz, & Catholiques : afin qu'iceux leurs Escoliers ayent vne impressio en leur esprit, & prennent la memoire de toute chose pertinente, soit de la Foy, soit de la correctio des mœurs, ou acquisitiō de la vertu.

Seront tenuz lesdictz Maistres de Escole toutes les festes solennelles, & autres du commandement de l'Eglise conduire leurs Escoliers à l'Eglise, à la Messe, à la predication, & au diuin office. A quoy eux mesmes assisteront, vacans à ces sainctz iours au seruice de Dieu, auquel ilz sont principalement destinez.

Plus ordōne ledict Senat, que tous Maistres d'escoles, venās aux pais de
l'obeis-

l'obeissance de son Altesse, pour instruire la ieunesse, seront approuuez par le Senat, ou autres magistratz qu'il plaira au Senat commettre, appelez avec eux les officiaux, ou vicaires des lieux, ou autre docteur en Theologie, en leur absence ou default. De laquelle approbation sera faicte acte que leur sera remis, sans ce que pour icelle acte soit prins, demandé, ny exigé aucun argent.

Tous maistres d'escoles ferōt confesser leurs escoliers & disciples quatre fois l'année : comme à Noël, Pasques, Pentecoste, & la Toussainctz. Feront aussi communier, & recevoir le precieux corps de IESVS CHRIST à ceux de leurs disciples qui seront à ce capables, en leur faisant vne remōstrāce sommaire auant qu'ilz aillent à ladiete confession & communion,

ARREST POVR

propre, & pertinente, pour l'importance tant de leurs pechez que de la medicine qu'ilz en rapportent par lesdictz saintz sacremens, afin que par cy apres aborissans & fuyas le peché, ilz facent vn passage en vn estat plus vertueux, conformes & conioinctz avec Dieu, & qu'ilz s'y entretiennent.

Serōt tenuz lesdictz maistres tous les mois dōner à leurs disciples quelques salutaires enseignemēs pour cognoistre les heretiques & faulx prophetes de ce temps. Et iceux documens accōmoder selon l'intelligence & capacité des entendemens de leurs escoliers, afin que par telz moyens ilz se puissent garder de surprises folles, & attirantes persuasiōs, d'iceux heretiques: lesquels souz le pretexte de la parole de Dieu, taschent

malicieusemēt à mettre chacū à vne
seule liberté de la chair, & en vn che-
min du tout repugnant à la Loy de
Dieu. Le tout sur peine de cent liures
pour la premiere fois, & de deux cēs
liures pour la secōde, & de punition
corporelle, & exemplaire pour la
tierce.

Plus ordonne le Senat, que tous te-
nās logis & hostelleries en ce ressort
serōt tenuz en leurs salles, chambres,
& autres lieux ou le plus souuent fre-
quenteront leurs hostes, tenir & met-
tre tables, ausquelles seront escritz &
cōtenuz les presens articles, & arrest:
afin que leursditz hostes les puissent
lire, & par ce moyen n'en pretendēt
ignorāce. Tenans semblablemēt aux
lieux plus apparēs de leursdictes ho-
stelleries & maisons les Catholiques
deuotes Images du Crucifix, pour

ARREST POVR

nous representer tousiours de plus en plus, & prendre la memoire de ce grand benefice que nous auõs receu par la mort & passion de nostre Sauueur Iesus Christ.

Et leur defend en oultre expressement le Senat, de ne laisser parler en leursdictes hostelleries & maisons, à leurs hostes de nostre sainte & Catholique religion par forme de doute, dispute, ou contention : sinon en tant que par tel deuis & propos, les parlans voulussent tēdre à vne exhortation de bien & catholiquement viure selon nostre sainte mere Eglise Romaine.

Leur enioint d'abondant ledit Senat, qu'ilz ayēt à tenir main qu'aucū ne voyſent loger en leurs maisōs portans liures ou catechismes imprimez & venans de lieux suspectz & suspe-

ctiōnez d'heresie. Et incōtinēt qu'ilz se serōt apperceuz d'aucuns porteurs de telz liures reprouuez, serōt tenuz lesdictz hostes les venir reueler au Senat, ou autres iuges ducaux des lieux, pour estre diligemment procedé ainsi que la matiere le requiert, selon droict & raison, sur les peines que dessus.

Et a ledict Senat tresexpressément defendu sur semblables peines, à to^s lesdictz tenans hostellerie en ce ressort de donner à manger à leurs hostes de chair, & autres viandes defendues, aux iours prohibez par nostre mere sainte Eglise, cōme en Carefme, & autres iours de ieusnes, & vigilles: sinō en cas de necessité de maladie, ou d'autre iuste & legitime empeschemēt, duquel seront bien asser-
tenez pour en rendre bonne cause

ARREST POVR

quand ilz en seront requis.

Et ausquelz hostes semblablement a defendu & defend tresexpressmēt le Senat, de ne tirer en leurs hostelleries, ny donner viures, quelz qu'ilz soyēt, aux prestres demeurans, & ayās leurs maisons & domicilles es villes & lieux ausquelz lesdictz hostes tiēdront leurs hostelleries, aux peines que dessus.

Semblablement sont faictes inhibitions & defenses, sur les peines susdictes, à tous bouchers de ce ressort de ne vēdre chair audict temps prohibé, sinon ceux qui pour les causes que dessus, & pour vrgente necessité, auront permission de ce faire, s'uyuāt le reglement donnez par autres arrestz du Senat.

Tous medecins & cirurgiēns de ce ressort, estans appelez à la visitation

des malades, seront tenuz selon leur pouuoir, & cōme en eux sera d'exhorter le detenu en maladie, de se cōfesser, & cōmunier cōme vn bon chretien, & vray Catholique, doit faire. Leur donnant par ce moyen la premiere & plus principale medicine qui concerne l'ame, sans estre si osez ny hardiz discourir avec eux pour leur tenir propos autres que catholiques, & selon la Religion de nostre mere saincte Eglise Romaine. Et c'est à peine d'estre dechassez hors des terres & estatz de son Altesse, & autre punition exemplaire plus grande, si elle y eschet.

Les hospitaux de ce ressort estans aux villes & communautiez d'icelle, seront visitez tous les moys, par vn des Senateurs & Conseilliers, ou autres magistratz, & personnes d'estat

ARREST POVR

qu'il plaira au Senat cōmettre, pour iceux hospitaux visiter, & entendre comme se despendent les deniers & reuenuz d'iceux qui doyuent estre employez à la nourriture & entretènement des pauvres, & non à autre vsage. Et par mesme moyen mettre ordre que les mendiants valides, & qui peuuent autrement gagner leur vie, ne prennent iniustement & à grād tort la substāce deüe aux vrays pauvres.

En outre ordōne ledict Senat que tous barbiers demeurans aux villes, & autres lieux de ce ressort, seront tenuz auoir (en leurs boutiques aux lieux plus apparens d'icelles, & en veue de ceux qui iront) tables contenant les presens articles & arrest, si qu'iceux se puissent aisement lire de tous.

Et leur

LA RELIGION.

Et leur a defendu & defend de tenir en leursdictes boutiques peintures lasciuës, & impudiques, prouo-
cans les hommes à cupiditez deshō-
nestes, & tentation de la chair. Ains
au lieu de ce tiēdront ausdictz lieux
images de crucifix, ou de quelque
autre sainte representation, attirans
les hommes par exemples, & inuita-
tions à toute sainteté de vie.

Et a ledict Senat prohibé & defen-
du sur semblables peines que dessus
à tous libraires de ce ressort, de ne te-
nir, vendre, ou faire vendre par eulx
ou interposites personnes, liures pro-
hibez, & censurez, & contenans cho-
ses contre nostre sainte Foy, & reli-
gion Catholique Romaine. Ains vē-
dront liures approuuez par la sain-
cte faculté de Theologie, & autres
telz qui leur seront donnez par me-

A R R E S T P O U R

moire & rolle, par le Reuerēdisſime
 Meſſire Antoine Poſſeuin comman
 deur de ſainct Antoine de Foſſan, cō
 miſſaire de la ſaincte Eglise, & de
 ſon Alteſſe en ceſt effect. Et par meſ
 me moyen faiēt inhibitions, & de
 fenſes à tous de ce reſſort qu'ilz ne
 ayent à tenir leſdictz liures reprou
 uez & cenſurez, & meſmes l'inſtitu
 tion de Caluin, ſon Catechiſme,
 les Pſeaumes de Marot, ou de Beze,
 liures de la confeſſion dudiēt Beze,
 Virel, & Farel, Bernardin Ochin,
 Zuingle, Luther, Oecolāpade, Pier
 re martir, confeſſion Auguſtane, Ca
 techiſme de Berne: & generalmente
 tous autres liures contrēuenans dire
 ctement ou indirectement à noſtre
 mere ſaincte Eglise Romaine. Et ſem
 blablement defend lediēt Senat à tous
 de ce reſſort, de chāter par les places,

& lieux communs des villes, & autrement à haulte & intelligible voix, chansons lasciuues, impudiques, deshonestes, ny semblablemēt les Pseumes de Dauid, traduitz par Marot, ou autres censurez. Par lesquelz chantz lon a cogneu estre adueni beaucoup de scādales & seditions en nostre mere sainte Eglise, & vnion des Chrestiens & Catholiques, estat plus scant vaquer aux oraisons accoustumées. Et pour cest effect aller aux Eglises, specialement dediées à ce: que ainsi à tous propos, & en tous lieux, prophaner & rendre triuialles noz oraisons & chantz.

Plus a faict le Senat expresses defenses à tous, pendāt qu'on celeberrera la grand Messe, qu'on preschera, & fera on le diuin office aux saintz iours des festes, de iouër en lieu que

ARREST P O V R

ce soit, à cartes, quilles, dez, & autres ieux prohibez. Mais assisteront aux presches, grandes Messes, & diuin seruice. Et obserueront en tout & par tout les arrestz desia sur ce réduz par le Senat. Côme aussi en ce qu'ilz portent defences, & inhibitions, de se pourmener par les Eglises pendant ledict diuin seruice, lesquels arrestz à ceste cause ordonne le Senat estre de nouveau publié, afin que nul ne en pretende cause d'ignorance.

Finalemēt le Senat faict. expres commandemēt & inionction à tous de ce ressort, qu'ilz ayent les festes & autres iours à ce ordōnez, assister aux procesions qui se feront, & les acō-pagner avec deüe reuerence, entendans seulement à prieres & oraisons, rendans tesmoignage de leur bon exemple de leur vie Chrestienne.

LA RELIGION.

Faisant le Senat tresexpresses inhibitions & defenses à tous les manans & habitans de ce ressort de quelque qualité ou condition qu'ilz soyent, de par cy apres commettre aux Eglises pēdāt qu'on administrera les sainctz Sacremens, mesmes du Baptesme, & Mariage, insolences, abuz & scandales: Mais seront tenuz avec toute reverence assister ausdictz Sacremens, & ausdictes Eglises, comme Dieu & nostre sainte mere Eglise Catholique Romaine l'ordonne, & c'est sur peine que dessus.

A ceste cause a enioinct tresexpressement le Senat à tous iuges Ducaux, & ordinaires des lieux, de faire particulierement en leurs ressorts, publier & garder le present arrest. Et aux substituez du Procureur general en faire les poursuites necessaires, & d'en ad-

uertir le Senat, à peine de s'en prédre
à eux, à leur propre & priué nom, &
lequel arrest, à ces fins ordonne le Se-
nat qu'il sera publié à son de trom-
pe, & cry public, par les carrefours
des villes, & autres lieux acoustumez
dudict ressort, afin qu'aucū n'en pre-
tende ignorance.

Faiët à Chambery, au Senat, & pu-
blié en audience publique, le vingt
& vnieme de Feurier, mil cinq cens
soixante deux. Et ledict iour publié
solennellement, par les carrefours de
ladiëte ville.

Collation faiëte. De la Pierre.